

U PRVOJ RADNOJ POSJETI OPĆINI DOBOJ JUG

Otvaraju se vidici saradnje u sektoru zaštite okoliša, zdravstva i sporta. Ambasador posjetio buduće industrijske zone ove općine

Nakon što su međusobno razmijenili informacije o mogućnosti saradnje Općine Doboj Jug i ambasade Češke u BiH, općinski načelnik Mirnes Tukić i Češki ambasador u Bosni i Hercegovini Jakub Skalnik obišli su buduće industrijske zone Karuše i Mravići, te se na terenu upoznali o razvojnim potencijalima ove najmanje općine u ZE-DO kantonu. Uz načelnika Tukića, ovom susretu su prisustvovali zamjenik predsjedavajućeg OV Maid Buljubašić, općinski vijećnik Muijo Avdić i savjetnica općinskog načelnika za razvoj Umihana Omerović-Krličević.

S obzirom da se Doboj Jug nalazi u međuriječju rijeka Usore i Bosne, na dva najfrekventnija magistralna puta M-17 Doboj-Teslić i M-4 Doboj-Banja Luka, da će budući koridor 5-C naslanjati se na ovo područje, da je blizina grada Doboja (saobraćajnog, a naročito željezničkog čvora) samo 4 kilometra, te da se Doboj Jug intenzivno razvija u skladu sa uspostavljenom strategijom, ambasador Skalnik nije krio zadovoljstvo ovom posjetom, jer je imao šta vidjeti. A vidio je brojne privredne objekte, uslužne firme u oblasti autobusnog saobraćaja, izgradnje puteva, zatim hipermarketa, do proizvodnih hala (tekstil, drvoprerađivače, velika skladišta roba za distribuciju, poput Euro-metala do solarne elektrane), srednjih preduzeća i malih privrednih radnji.

„Ovo je izvrstan poduzetnički kraj“, kazao je ambasador Češke, naglasivši da je Bosne i Hercegovina prema odluci njegove vlade iz 2010. godine potvrđena kao jedna od pet prioriternih zemalja za razvojnu saradnju u periodu do 2017. godine. Češka razvojna saradnja će se više fokusirati na razmjenu iskustava i pružanje pomoći u izgradnji kapaciteta za pregovore i kasnije članstvo u EU, prihvatanje legislative i tehničke pomoći. Program identifikira šest prioriternih sektora za saradnju, a to su vodosnabdjevanje i sanitacija, opšta zaštita okoliša, proizvodnja i isporuka energije, državna uprava i građansko društvo i zdravstvo, dok je ulaganje u sektor poljoprivrede, šumarstvo i ribarstvo bar za ovu godinu skoro zanemariv. Za sve forme razvojne saradnje sa Bosnom i Hercegovinom u aktuelnom programskom periodu Republika Češka izdvaja sredstva u obimu od 2,5-3 miliona EUR –a godišnje.

Što se tiče Doboja Juga, ambasador Skalnik je najavio mogućnost podrške Češke malim projektima u vrijednosti do deset hiljada Eura, (oblast zdravstva, marginalizovane grupe, sport i drugo), a to će biti precizirano javnim pozivom kojeg će ova ambasada raspisati u septembru ove godine. Znajući da se direktivom EU o zaštiti životne sredine trebaju stvarati uslovi za zdravu životnu sredinu, brojne bh općine su suočene sa nedostatkom infrastrukturnih resursa kao što su obnovljivi izvori energije, sakupljanje smeća i rješavanje odlagališta otpada. Republika Češka u ovom sektoru ima velika iskustva, pa je preporučeno načelniku Tukiću da prema Ambasadi Češke u BiH Doboj Jug kandidira projekat sortirnice za reciklažu otpada, nabavku kontajnera za razvrstavanje otpada i ostale opreme do vrijednosti od pola miliona Eura.

U pratnji ambasadora Republike Češke u BiH bila je koordinatorica za razvojnu saradnju Anesa Terza Vuković.